

Uunga siunnersuut: Kommunini suliassaqarfiit aaqqissuuteqqinneqarnerata allangortinneqarneranik Inatsisartut inatsisaat nr. xx, xx,xxx 2016-imeersoq

Kapitali 1

Kommunip agguarneqarnera

§ 1. 1. januar 2018 aallarnerfigalugu Qaasuitsup Kommunia kommuninut marlunnt avinneqassaaq.

Imm. 2. Siusinnerusukkut kommuniusimasut, 1. januar 2009-mi kommunitut atorunnaarsinneqartut aallaavigalugit, Kommuni 1-imi imatut inissinneqassapput:

- 1) Qaanaap Kommunia,
- 2) Kommuneqarfik Upernavik,
- 3) Uummannap Kommunia, aamma
- 4) Ilulissat Kommunia

Imm. 3. Siusinnerusukkut kommuniusimasut, 1. januar 2009-mi kommunitut atorunnaarsinneqartut aallaavigalugit, Kommuni 2-mi imatut inissinneqassapput:

- 1) Qeqertarsuup Kommunia,
- 2) Qasigiannugit Kommunia,
- 3) Aasiaat Kommunia, aamma
- 4) Kangaatsiap Kommunia.

Kapitali 2

Qinersineq

§ 2. Maannakkut Qaasuitsup Kommunerisaani ikaarsaariarnermut ataatsimiititaliassanik marlunnik 4. april 2017-imi qinersisoqassaaq. Qinersinerit kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsisaanni aalajangersakkat naapertorlugit ingerlanneqassapput.

Imm. 2. Qaasuitsup Kommuniani kommunalbestyrelsimut qinersisoqassanngilaq.

Imm. 3. Qaasuitsup Kommuniani kommunalbestyrelsip piffissaq atuuffia ulloq 31. december 2017-p tungaanut sivitsorneqassaaq.

Kapitali 3

Ikaarsaariarnermi ataatsimiititaliat

§ 3. Ikaarsaariarnermi ataatsimiititaliat marluusut ima katitigaassapput:

1) Kommuni 1-imi ikaarsaariarnermi ataatsimiititaliami ilaasortat 17-it, tak. § 1, imm. 2, aamma

2) kommuni 2-mi ikaarsaariarnermi ataatsimiititaliami ilaasortat 15-it tak. § 1, imm. 3.

§ 4. Ikaarsaariarnermi ataatsimiititaliami ilaasortaq utoqqaanersaq inissititerluni ataatsimiinnissamut aggersaassaaq.

Imm. 2. Ikaarsaariarnermi ataatsimiititaliaq inissititissaaq Inatsisartut inatsisaanni kommunit aquneqarnerat pillugu aalajangersakkat naapertorlugit. Inissititerluni ataatsimiinneq kingusinnerpaamik 1. juni 2017 ingerlanneqarsimassaaq.

Imm. 3. Ikaarsaariarnermi ataatsimiititaliat isumaqatigiinniarni ikaarsaariarnermi ataatsimiititaliani siulittaasut qinerneqarnissaasa tungaanut ilaasortamit ataatsimiinnissamut aggersaasumit aquneqassapput.

§ 5. Ikaarsaariarnermi ataatsimiititaliani ilaasortat kommunit aquneqarnerat pillugu Inatsisartut inatsisaanni kommunalbestyrelsimi ilaasortat akissarsiaat pillugit aalajangersakkat atuuttut malillugit akissarsiaqartinneqassapput.

Imm. 2. Ikaarsaariarnermi ataatsimiititaliani siulittaasut, siulittaasut tullii aamma siulittaasut tullisa aappaat kommunit aquneqarnerat pillugu Inatsisartut inatsisaanni borgmesterit, borgmesterit tullisa aamma borgmesterit tullisa aappaat akissarsiaat pillugit aalajangersakkat atuuttut malillugit akissarsiaqartinneqassapput.

§ 6. Ulloq 1. januar 2018-imi kommunini nutaani ikaarsaariarnermi ataatsimiititaliat kommunalbestyrelsitut atuutilissapput 2021-imilu aprilimi kommunalbestyrelsinut qinersinissap tungaanut atuutissallutik.

§ 7. Kommunini nutaani taakkunani ikaarsaariarnermi ataatsimiititaliani siulittaasut borgmesteritut, siulittaasut tullii borgmesterip tulliatut siulittaasullu aappaat borgmesterip tulliaa aappaattut ingerlaqqissapput.

Kapitali 4

Pisussaaffiit piginnaatitaaffillu

§ 8. Ikaarsaariarnermi Ataatsimiititaliat atuunnerminni kommunit aquneqarnerat pillugu inatsisartut inatsisaat naapertorlugu sulissapput.

§ 9. Ikaarsaariarnermi ataatsimiititaliat pingaarnertut suliassaat tassaavoq Qaasuitsup Kommuniata kommuninut marlunnut nutaanut avinneqarnissaata piareersarnissaa.

§ 10. Ikaarsaariarnermi Ataatsimiititaliat kommunit nutaat aqutsinermut ileqqoreqqusassaannik suleriaasissaannillu suliaqassapput.

Imm. 2. Ikaarsaariarnermi Ataatsimiititaliat aningaasaqarnermut ataatsimiititaliamik tamarmik immikkut pilersitsissapput taassumalu ataani ataatsimiititalianik allanik pilersitsisinnaallutik.

§ 11. Ikaarsaariarnermi ataatsimiititaliat aalajangersakkat 1. januar 2018 -imiit atuutilersumi inatsimmi pisortat suliassa qarfiinik kommunit nutaat nakkutiginnissinnaanerannik aalajangersakkat pisariaqartitat aalajangiiffigissavaat.

Imm. 2. Ikaarsaariarnermi ataatsimiititaliat kommunip nutaap qanoq ateqarnissaanik sumillu ilisarnaateqarnissaanik kissaatitik kingusinnerpaamik ulloq 1. august 2017 aalajangiiffigissavaat.

§ 12. Ingerlatsiviit siunissami sumi inissinneqassanersut ikaarsaariarnermi ataatsimiititaliat aalajangiiffigissavaat.

Imm. 2. Kommunimi nutaami allaffeqarfik ikaarsaariarnermi ataatsimiititaliat piareersassavaat, allaffeqarfiullu pilersinneqarnissaanut allaffissornermi aqutsisut pisariaqartumik amerlassuseqartut atorfinitsissallugit.

Imm. 3. Sumi inissiinissaq allaffissornermilu aqutsisunik atorfinitsitsinissat kingusinnerpaamik 31. december 2017 aalajangiiffigineqareersimassapput.

Kapitali 5

Sulisut

§ 13. Tjenestemandit Qaasuitsup Kommuniani atorfeqartut maannamut atugassaritinneqartut assigalugit kommunit nutaat marluusut arlaasa ataanni ulloq 1. januar 2018-imi atorfeqalissapput. Atorfinitsitsinissamik piginnaatinneqartoq tamassuma kingorna tassaassaaq kommunalbestyrelsi nutaaq atorfeqarfiusorlu tassaassalluni kommuni nutaaq.

Imm. 2. Sulisut isumaqatigiissutit naapertorlugit imaluunniit inuit ataasiakkaarlugit immikkut atugassaritinneqarlutik atorfeqartut Qaasuitsup Kommuniani atugassaritinneqartut assingi atorlugit suliassatik suliarinnarlugit nuunnissamik neqeroorfigineqassapput.

Kapitali 6

Aningaasaqarneq, missingersuutit, naatsorsuutit kukkundersiuisarnerlu

§ 14. Ikaarsaariarnermi ataatsimiititaliat ingerlatsineranni aningaasartuutit Qaasuitsup Kommunianit akilerneqassapput.

Imm. 2. Tapiissutininik naatsorsuisarneq aningaasartuuteqarnerlu pillugit Naalakkersuisut erseqqinnerusumik maleruagassiorsinnaapput.

Imm. 3. Qaasuitsup Kommuniani kommunalbestyrelsi ikaarsaariarnermi ataatsimiititalianut marluusunut akiliutitaqanngitsumik allaffissornikkut ikiorsiissaaq.

§ 15. Ikaarsaariarnermi ataatsimiititaliap siulittaasuata ikaarsaariarnermi ataatsimiititaliap missingersuutininut siunnersuutissaa suliarissavaa kingusinnerpaamillu 1. juli 2017 saqqummiutissallugu.

Imm. 2. Missingersuutininut siunnersuut ikaarsaariarnermi ataatsimiititaliap suliarissavaa akueralugulu kingusinnerpaamik 1. august 2017.

Imm. 3. Ikaarsaariarnermi Ataatsimiititaliap missingersuutip akuerineqarneranit ullut 14-it qaangiutsinnagit missingersuut Naalakkersuisunut ingerlatissavaa missingersuutinullu nassuiaammik tamanut saqqummiilluni.

§ 16. Kukkuersiuisoq suliamik ilisimasaqartoq kina ikaarsaariarnermi ataatsimiititaliat 2017-imut naatsorsuutaannik kukkuersiuisanersoq ikaarsaariarnermi ataatsimiititaliat kingusinnerpaamik 1. august 2017 aalajangissavaat.

Imm. 2. Ikaarsaariarnermut ataatsimiititaliat 2017-imut naatsorsuutaat kommunimi nutaami aningaasaqarnermut ataatsimiititaliap kommunalbestyrelsimut saqqummiutissavaat, taamaalilluni ukiumoortunik naatsorsuutit kingusinnerpaamik 1. juni 2018 kukkuersiuisumut tunniunneqarsinnaaniassammata.

§ 17. Kommunit nutaat 2018-imut missingersuutissaat ikaarsaariarnermi ataatsimiititaliat akuerissavaat.

Imm. 2. Ikaarsaariarnermi ataatsimiititaliat kommunit nutaat siunissami ingerlatsinissaasa annertussusissaat pillugu pingaarnertut politikkiussapput. Ikaarsaariarnermi ataatsimiititaliat kommunini nutaani akileraarutit annertussusissaat, akit sullissinerillu annertussusissaat aalajangersassavaat.

§ 18. Kommunip aningaasaqarnerup ineriartornera pillugu Qaasuitsup Kommuniani kommunalbestyrelsip ikaarsaariarnermi ataatsimiititaliat ingerlaavartunik ilisimatittassavaat, tassunga ilanngullugit 2017-imi tapiliussatut aningaasaliissutit.

Imm. 2. Qaasuitsup Kommuniata 31. december 2017 tungaanut aningaasatigut aalajangiisarneri pillugit Naalakkersuisut malittarisassaliorsinnaapput.

§ 19. Pisussaaffiit pisinnaatitaaffillu aamma pisassarisat akiligassallu kommunit nutaat marluk Qaasuitsup Kommunianit 1. januar 2018 tigussavaat.

Imm. 2. Kommunip isumaqatigiissutai, atsiornikkut isumaqatigiissusai, isumaqatigiissutai, pisussaaffiit inissitat pisussaaffigilersinnaasaaluunniit tamaasa Qaasuitsup Kommuniata ulloq 1. juli 2017 nallertinnagu misissussavai ikaarsaariarnermi ataatsimiititalianut marluusunut saqqummiutissallugit. Agguaannissaat ikaarsaariarnermi ataatsimiititaliat tamassuma kingorna isummerfigissavaat.

Imm. 3. Qaasuitsup Kommuniani pisassarisat akiligassallu agguarnissaat tassunga ilanngullugu aaqqiagiinnngissutinik aaqqiissutaasartussat pillugit Naalakkersuisut immikkut maleruagassaliorsinnaapput.

§ 20. Qaasuitsup Kommuniata 2017-imut naatsorsuutai, naatsorsuutininik saqqummiussisarneq pillugu malittarisassat malillugit saqqummiunneqassapput.

Imm. 2. Kukkuersiineq Qaasuitsup Kommuniani siornatigut kukkuersiuisorisimasaanit ingerlanneqassaaq.

Imm. 3. Naatsorsuutininik saqqummiussisarneq pillugu Naalakkersuisut erseqqinnerusumik malittarisassaliorsinnaapput.

Kapitali 7

Aalajangersakkat allat

§ 21. Ikaarsaariarnermi ataatsimiititaliat allagaatinik uppernarsaatinik Qaasuitsup Kommunianit atorfissaqartitsippata, allagaatillu uppernarsaatit pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat aamma pisortat ingerlatsineranni suliasat suliarineqartarnerat pillugu Inatsisartut inatsisaat naapertorlugit suliffiup iluani atugassaappata, allagaatit uppernarsaatit ingerlateqqinneranni suliffiup iluani atugassaanerat atorunnaassanngilaq.

§ 22. Qaasuitsup Kommuniani borgmesteri kommunit aqunneqarnerat pillugu Inatsisartut inatsisaanni borgmesterit akissarsiaat pillugit aalajangersakkat atuuttut malillugit 1. maj 2017-imiit 31. december 2017-imut akissarsiaqassaaq.

Imm. 2. Qaasuitsup Kommuniani borgmesteri ikaarsaariarnermi ataatsimiititaliat arlaanni aamma qinigaaguni marloriaammik akissarsiaqassanngilaq.

Imm. 3. Qaasuitsup Kommuniani kommunalbestyrelsimi ilaasortat kommunit aqunneqarnerat pillugu Inatsisartut inatsisaanni kommunalbestyrelsimi ilaasortat akissarsiaat pillugit aalajangersakkat atuuttut malillugit 1. maj 2017-imiit 31. december 2017-imut akissarsiaqassapput.

Kapitali 8

Atuutilersinneqarnera

§ 23. Inatsisartut inatsisaat 1. januar 2017-imi atuutilerpoq.

Namminersorlutik Oqartussat, ulloq xxx

Kim Kielsen